

საქართველოს ახალგაზრდა იურისტთა ასოციაცია GEORGIAN YOUNG LAWYERS' ASSOCIATION



საიას ივნისის თვის წარმატებული საქმეები

სასამართლომ ხონის საკრებულოს თავმჯდომარე უდანაშაულოდ ცნო და მის მიმართ გამამართლებელი განაჩენი გამოიტანა

საიას ქუთაისის ფილიალის დახმარებით, საქართველოს უზენაესმა სასამართლომ ხონის საკრებულოს თავმჯდომარე გ.გ. უდანაშაულოდ ცნო და მის მიმართ გამამართლებელი განაჩენი გამოიტანა.

გ.გ-ს ბრალად ედებოდა სამსახურებრივი უფლებამოსილების ბოროტად გამოყენება. კერძოდ, ბრალდების შესახებ დადგენილების თანახმად, მან საჯარო ინტერესების

საწინააღმდეგოდ, ბოროტად გამოიყენა სამსახურებრივი უფლებამოსილება, რითაც სახელმწიფოს მიადგა 10200 ლარის ოდენობის მატერიალური ზიანი. აღსანიშნავია რომ ამ პირის მიმართ გამამართლებელი განაჩენი იგივე ბრალდებაზე გამოტანილი ჰქონდა პირველი ინსტანციის სასამართლოს, რომელიც მოგვანებით სააპელაციო სასამართლომ გააუქმა და გ.გ წარდგენილ ბრალდებაში დამნაშავედ ცნო.

უზენაესმა სასამართლომ გაიზიარა დაცვის მხარის პოზიცია, დადგენილად მიიჩნია, რომ გამოვლენული მტკიცებულებები წარდგენილი ბრალდების დასადასტურებლად და გონივრულ ეჭვს მიღმა სტანდარტის დასაკმაყოფილებლად არ იყო საკმარისი. შესაბამისად, საქართველოს უზენაესმა სასამართლომ დააკმაყოფილა მსჯავრდებულ გ.გ-ს და მისი ინტერესების დამცველი ადვოკატის საკასაციო საჩივარი, გააუქმა ქუთაისის სააპელაციო სასამართლოს სისხლის სამართლის საქმეთა პალატის 2013 წლის 07 ნოემბრის განაჩენი და მსჯავრდებული გ.გ. უდანაშაულოდ ცნო.

მოძალადეს ოჯახური ძალადობის მსხვერპლის მიმართ სიტყვიერი, ფიზიკური და ფსიქოლოგიური ძალადობის მიყენება აუკრძალა

2014 წლის 10 ივნისს რუსთავის საქალაქო სასამართლომ დააკმაყოფილა ოჯახური ძალადობის მსხვერპლის, მ.ქ-ს განცხადება დამცავი ორდერის გამოცემასთან დაკავშირებით. მის ინტერესებს სასამართლოში საიას რუსთავის ოფისის ადვოკატი იცავდა. სასამართლო პროცესზე დადასტურდა მ.ქ-ს და მისი არასრულწლოვანი შვილის ა.მ-ს მიმართ, ყოფილი მეუღლის გ.მ-ს მხრიდან ძალადობის ფაქტები. რუსთავის საქალაქო სასამართლომ მიიღო გადაწყვეტილება მოძალადის მიმართ დამცავი ორდერის გამოცემის შესახებ და სასამართლოს გადაწყვეტილებით აუკრძალა მსხვერპლების მიმართ სიტყვიერი, ფიზიკური და ფსიქოლოგიური ძალადობის მიყენება, მათ საცხოვრებელ სახლთან მიახლოვება და სატელეფონო კონტაქტი. დამცავი ორდერი გამოცემულ იქნა 3 თვის ვადით.

ადმინისტრაციული პასუხისმგებლობისაგან კიდევ ერთი მოქალაქე გათავისუფლდა

საიას ოზურგეთის ოფისი სასამართლოში იცავდა მოქალაქე დ.თ-ს ინტერესებს, რომელიც თბილისში, საახალწლო ბაზრობაზე მის საკუთრებაში არსებულ მიწის ნაკვეთში გამოყვანილ კავკასიური ნაძვის ნერგებს ყიდდა. მაკონტროლებელი გარემოსდაცვითი ზედამხედველობის დეპარტამენტის თანამშრომლის მოთხოვნისთანავე დ.თ-მ მას წარუდგინა ოზურგეთის მუნიციპალიტეტის ბაზვის თემის რწმუნებულის მიერ გაცემული ცნობა საქონლის ადგილწარმოშობის შესახებ. მიუხედავად ამისა, დ.თ-ს ჩამოართვეს

საქართველოს ახალგაზრდა იურისტთა ასოციაცია GEORGIAN YOUNG LAWYERS' ASSOCIATION



ნაძვის ხის ნერგები და გარემოსდაცვითი ზედამხედველობის დეპარტამენტის მიერ მის მიმართ შედგენილ იქნა ადმინისტრაციული სამართალდარღვევის ოქმი თვითმმართველი ერთეულის ან კერძო საკუთრებაში არსებულ ტერიტორიაზე მოპოვებული ხე-მცენარის საქართველოს მთავრობის დადგენილებით განსაზღვრულ შემთხვევებში სათანადო დოკუმენტის გარეშე ტრანსპორტირებისათვის.

საიას ოზურგეთის ოფისის ადვოკატის დახმარებით, თბილისის საქალაქო სასამართლოში შეწყდა ადმინისტრაციული სამართალდარღვევის საქმე და საქმეში არსებული მტკიცებულებებით არ დადასტურდა დ.თ-ს მიერ ადმინისტრაციული სამართალდარღვევის ჩადენის ფაქტი.

მოქალაქეებს აუნაზღაურდათ სახელფასო დავალიანება

საიას ოზურგეთის ოფისი სასამართლოში იცავდა ზ.ბ-ს, თ.კ-ს და სხვათა (სულ 10 პირი) ინტერესებს, რომლებიც შრომითი ხელშეკრულების საფუძველზე დასაქმებულნი იყვნენ შ.პ.ს. **ქ[] [] [] [] []** ჩოხატაურის ფილიალში. წარმოშობილი სახელფასო დავალიანების ანაზღაურების მოთხოვნით მათ სარჩელი აღძრეს დამსაქმებლის წინააღმდეგ.

საიას დახმარებით, ოზურგეთის რაიონული სასამართლოს გადაწყვეტილებით სარჩელი სრულად დაკმაყოფილდა. მოპასუხე შ.პ.ს. **ქ[] [] [] [] []** მოსარჩელეთა სასარგებლოდ დაეკისრა სახელფასო დავალიანების 36812 ლარის, ასევე შრომის ანაზღაურების ყოველი დაყოვნებული დღისთვის 0.07 % -ს - 3040 ლარის ანაზღაურება.